

ILUARSISSUT**Isumaliutissiissut ulloq 29. april 2016-imeersoq taarserpaa**

(Tunuliaqt: Isumaliutissiissutip qulequtaa kukkusuummat iluarsineqarpoq)

**Uunga siunnersuut: Inuussutissarsiutinik ilinniartitsinerit aamma inuussutissarsiutinik
ilinniartitsinerup iluani pikkorissaanerit pillugit Inatsisartut inatsisaata
allannngortinneqarneranik Inatsisartut inatsisaat nr. xx, xx xx 2016-imeersoq.**

(Ilinniarernik piginnaasalissutaasunillu ingerlatsinernik allanik neqerooruteqarsinnaanermut tunngavissiineq, lærlinginut isumaqatigiissuteqarsinnaanermut immikkut periarfissiineq, atuarfinni sulilluni sungiusarnernut, ileqqoreqqusanut il.il. tunngasunik aalajangersakkanik erseqqissaaneq kiisalu Oqaatsinik Pikkorissarfik pillugu Inatsisartut inatsisaannik atorunnaarsitsineq)

pillugu

**Kultureqarnermut, Ilinniartitaanermut, Ilisimatusarnermut
Ilageeqarnermullu Ataatsimiititaliap**

siunnersuutip aappassaaneerneqarneranut

ISUMALIUTISSISSIONTA

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliaq suliarinninnermini ukuninnga inuttaqarpoq:

Inatsisartunut ilaasortaq Vivian Motzfeldt, Siumut, siulittaasoq

Inatsisartunut ilaasortaq Peter Olsen, Inuit Ataqatigiit, siulittaasup tullia

Inatsisartunut ilaasortaq Suka K. Frederiksen, Siumut

Inatsisartunut ilaasortaq Poul Hansen, Demokratit

Inatsisartunut ilaasortaq Mimi Karlsen, Inuit Ataqatigiit

Siunnersuut UPA2016-ip ingerlanneqarnerani ulloq 12. april siullermeerlugu suliarineqarnerata kingorna ataatsimiititaliamit misissorneqarpoq.

1. Siunnersuutip imarisai siunertaalu

Siunnersuut arlariinnik sammiveqarpoq. Taamaaliornikkut siunnersuummi ilaatigut qulakkeerniarneqarpoq akuerisaasumik inuussutissalerinermut sammiveqartunik ilinniartitsinermi piareersaataasumik faginut neqeroorutaasut taakkunumngalu misilitsinnermut inatsisitigut tunngavissaqalernissaq (AEU).

Ilanngullugulu siunnersuummi paaserusunneqarpoq inuussutissarsiuutnik qitiusumillu ilinniarfiit ingerlaqqiffiusumik ilinniarnermut neqeroorutaasa ilaasa tunngavissaat suunersut qulaajassallugit. Uani taamaallaat pineqarput ingerlaqqiffiusumik ilinniakkat Kalaallit nunaanni neqeroorutaariinngitsut.

Tamatuma saniatigut siunnersuutigineqarpoq ilinniarfimmi sungiusarluni sulinerup suliffeqarfimmi sungiusarluni sulinermut taarsiullugu sungiusarluni sulisinnaanissaq, tamanna ima paasillugu ilinniliartoq suliffeqarfimmi sulinermut sungiusarfissaqanngikkuni taarsiullugu suliffimmut sungiusarneq inuussutissarsiuutnik ilinniagaqarfimmi ingerlassinnaallugu. Tamatumunnga atatillugu ilinniarfinni ilinniarnermi aamma ilinniarfinni sungiusarluni sulinermi ilinniagaqarnersiutinut malittarisassanik suliaqartoqassaaq. Tamatumunnga tunngatillugu atuarfimmilu suliffimmik sungiusarnermi ilinniarnermut isumaqtigiissut atunngikkaluarlugu ilinniagaqarnersiutit pillugit maleruagassanik suliaqartoqassalluni

Ilanngullugu siunnersuutigineqarpoq inuussutissarsiuutnik ilinniagaqarnerup nalaani pikkorissarnermi angalanermut najugaqarnermilu killilimmik tapiissutinik pissarsisarnermut tunngasunik aalajangersakkat ullumikkut killiliisartut atorunnaarsinneqarnissaat. Killilersuineq tamanna ilinniagaqarsimaneq patsisigalugu ullumikkut tunngavilorsorneqartarpooq.

Imarisat inuussutissarsiornermi ilinniartitaanermut tunngasut qulaani taaneqartut saniatigut siunnersuummi matumani ilanngullugu siunnersuutigineqarpoq Oqaatsinik Pikkorissarfik pillugu Inatsisartut Inatsisaata atuuttup atorunnaarsinneqarnissaat. Tamanna ima isumaqarpoq; Oqaatsinik Pikkorissarfimmi sulianut sinaakkutaasut Naalakkersuisunit toqqaannartumik aalajangersorneqartalernissaannik. Tamanna siunissami oqaatsinik pikkorissarfimmi ingerlanneqartunut tamanut atuutilissaaq. Siunnersuut una taamatut isikkoqartillugu akuerineqassappat Oqaatsinik Pikkorissarfip siunissami suliassaanut tamanut atuuttussaavoq.

2. Siunnersuutip Inatsisartuni siullermeerneqarnera

Siunnersuut siullermeerlugu eqqartorneqarpoq 13. april 2016. Tassani siunnersuut tamakkiisumik partiinit tamanit attaviitsumillu tapersorsorneqarpoq, taamaattorli inersuarmi oqallinnermi erserpooq ilinniarnermi suliffimmik sungiusarfissamik ujaasinermut tunngatillugu akisussaaffimmik agguataarineq, siunnersuummilu aningaasaqarnikkut pissutsit il.il. oqallisigineqarnissaat kissaatigineqartoq.

3. Tusarniummut akissutit

Tusarniaanermi akissuteqaatit tiguneqartut inatsisisstatut siunnersuummut ilanngunneqarsimapput, tamannalu Inatsisartuni Siulittaasoqarfiup piumasaqaataanut naapertuuppoq.

Siunnersuut 4. december 2015 aamma 8. januar 2016 akornani tusarniutigineqarsimasoq ataatsimiititaliamit maluginiarneqarpoq. Naalakkersuisut sulinngiffeqarnerup nalaani tusarniaanermi piffissamik sivitsueqqaaratik tusarniaasannginnissaat ataatsimiititaliamit kaammattuutigineqassaaq. Tusarniaaffigineqartut tusarniutigineqartumut kinguneqarsinnaasumik piviusorsiortumik isummersinnaanermut periarfissinneqartariaqarput. Tamatumani lu pingaartumik Naalakkersuisoqarfiit ilisimappassuk tusarniaaffigineqartut sulinngiffeqarfiusup pineqartup nalaani inatsisisstatut siunnersuutit pillugit tusarniutinik arlalinnik tigusisinnaasarnerat.

Ataatsimiititaliap paasinninera malillugu siunnersuut una ima pinartiginngilaq tusarniaaneq piffissamik sivitsueqqaarnani sulinngiffeqarnerup nalaani ingerlattariaqartutut. Inatsisisstatut siunnersuutit il.il tusarniutigineqartut imarisaasa misissorneqarnissaanut suliffeqarfiit tusarniaaffigineqartut piffissaqartinneqartarnissaannik Naalakkersuisut qulakkeerinninniaartaqqullugit ataatsimiititaliamit innersuussutigineqarpoq. Ilaatigut tusarniaanermi piffissaritinneqartoq naammattoq Inatsisartuni aalajangiinissamut tunngavissat pitsaanersarigaat ataatsimiititaliamit isumaqarfigineqarpoq.

4. Siunnersuutip ataatsimiititaliami suliarineqarnera

4.1 Inuussutissarsiutinik ilinniarnerit pillugit

Inuussutissarsiutermut iliniarfiiit ilinniartunik amerlanerusunik tigusisalerneranut amerlanerusut ilinniakkaminnik naammassinnittarneranik kinguneqartumut tapersersuinini Aallaqqaasiullugu ataatsimiititaliap oqaatigerusuppa. Taamaalilluni ersarippoq nunatsinni ilinniagaqartut unammilligassaasa annersarigaat ilinniarnermut atatillugu sulifimmik sungiusarfissamik nassaarnissaq. Inuussutissarsiutinik ilinniagaqarfinni suliaqartut aamma politikkut suliaqartut inatsisitigut suliniuteqarnerup ilinniagaqarfinnut isersinnaaneq iliniakkamillu naammassinnissinnaaneq pillugit nunap ajornartorsiutai annertuut inatsisitigut allanguinerinnakkut iluarsineqarsinnaaneranik isumaqalinnginnissaasa pingaaruteqarnera ataatsimiititaliamit erseqqissaatigineqassaaq. Suliniutit inatsisitigut sinaakkutissanik taamaallaat tunngaveqartariaqanngillat, aammali suliffiit ataasiakkaat avatangiisaanut, ilinniartut ataasiakkaat isumaannut taamatuttaarlu inuiaqatigiit ataatsimut ilinniagaqartarnermut isummertarnermut tunngasinnaallutik. Akisussaaffik politikkut suliaqarnermiippoq, suliffeqarfinni kiisalu inuttaasuni namminermi.

Ilinniartut inuussutissarsiutinik ilinniakkaminnik naammassinnittarnissaannut kajumissaarutitut iliniarfinni sulinermut sungiusartarnissaq pillugu siunnersuut una ataatsimiititaliamit isigineqarpoq. Ilinniarnermut atatillugu sulifimmik sungiusarfissanik inuussutissarsiutinullu ilinniarfinnik amerlanernik pilersitsisoqarnissaanik suliniuteqarnerup

tamakkiinerusumik ingerlanneqarnissaanut Naalakkersuisut kaammattuinerusariaqartut ataatsimiititaliamit isumaqarfingineqarpoq. Tamanna assersuutigalugu ingerlanneqarsinnaavoq pisortat suliariumannittussarsiuussinerisa eqqumaffigineqarnerisigut kiisalu nunatsinni suliffeqarfinni namminersortuni, Namminersorlutik Oqartussaat piginneqatigiiffiini il.il ilinniarnermut atatillugu suliffimmik sungiusartunik tigusarnerup iluaqutaassusaanik erseqqissaasarnermi. Kingullertullu ataatsimiititaliamit maluginiarneqarpoq suliffimmi sungiusarfissanik amigaateqarnerup oqallisigineqarnerani inuiaqatigiinni ilinniarnermut atatillugu suliffimmik sungiusartunik tiguseqqinnissamat annertuumik periarfissaqartitsisoqartoq.

Ilinniarnerup ingerlanerani suliffimmik sungiusartarnerup ilinniarnermut iluaqutaanera aammalu sulisussanik akikitsumik sulisinnaasutut iluaqtiginiarneqartussatut isigineqannginnissaat ataatsimiititaliamit pingartinneqarmat erseqqissaatigineqassaaq. Tamanna atuuppoq ilinniartoq suliffeqarfimmi ilinniagaqarfimmiluunniit suliffimmut sungiusarpat.

Imm. 6 tunngavigalugu illoqarfimmi ilinniagaqarfimmi pinnani illoqarfimmi allami pikkorissarnermut peqataassagaanni angalanermut ineqarnermullu aningaasartuutaasussanik oqilisaassinerussaaq. Siunnersuutip ilinniakkamut allamut nuussinnaaneq periarfissimmagu ataatsimiititaliamit iluarisimaarneqarpoq.

4.2 Oqaatsinik Pikkorissarfik pillugu

Oqaatsinik Pikkorissarfik pillugu Inatsisartut inatsisaat nr. 14, 6. november 1997- imeersup atorunnaarsinneqarnerani kinguneqaataasussanut ataatsimiititaliaq annertunerusumik oqaaseqaatissaqanngilaq. Taamaattorli ilinniartitaaneq pillugu inatsimmut allannguutissatut siunnersuummut atatillugu inatsisip allap Naalakkersuisunit atorunnaarsinneqarnissaa ataatsimiititaliamit tupagineqarpoq. Inuussutissarsiutinut ilinniarnermut inatsit oqaatsinik pikkorissarfimmut attuumassuteqanngilaq.

Kalaallit Nunaanni inuiaqatigiinni kalaallit oqaasiisa siammarsarneqarnerani suliaq kiisalu Kalaallit Nunaanni oqaatsinik piginnaasanik ineriartortitsineq ataatsimiititaliamit malinnaaffiginiarneqarpoq

5. Inatsimmik iluarsiineq

Inatsisisatut siunnersuutip nassuaatitaasa ilusilersorneqarneranni kukkuneqartoq kiisalu § 1 oqaaseqatigiit pingajuannut nassuaat amigaataasoq immikkoortup ataatsimiititaliamit suliarineqarnerani malugineqarpoq. Ataatsimiititaliap paasivaa tamanna Naalakkersuisunut eqqumaffigineqartoq aammalu tamatuma aaqqinneqarnissaa siunnersuutip matuma aappassaanneerneqarneranut aaqqiissuteqalersaartut.

6. Siunnersuutip aningaasatigut kingunissai

Siunnersummut nassuaatini nalinginnaasuni allassimavoq inuussutissarsiuutinut iliniagallit maanaannaq unitsitsisarnerisa apparnissaa naatsorsuutigineqartoq. Ataatsimut isigalugu inuussutissarsiuutinut ilinniartitaanerup pitsangoriarnissaa siunnersuuteqartup naatsorsuutigaa. Siunnersuut pisortanut aningaasartuutaasussanngitsutut isigineqartoq ilanngullugu oqaatigineqarpoq. Taamatut isumaqarneq ataatsimiititaliamit tamakkiisumik isumaqatigineqanngilaq Naalakkersuisunullu kaammattuutigissallugu inatsisisstatut siunnersuutip aningaasaqarnikkut allaffissornikkullu kingunerisinnaasai sukumiinerusumik naliliiffigesaqqullugit. Siunnersuutip aningaasaqarnikkut kingunerisassaasa pissusissaatut peqqissaartumik nassuaatignerat siunnersummut namminermut patajaallisaataaginnarani aammali Inatsisartut aalajangiinissamut tunngavissaqarnissaannut patajaallisaataasarloq.

Imm. 6-mi takuneqarsinnaavoq ullumikkut ilinniartut illoqarfisartik qimallugu inuussutissarsiuutinut pikkorissarnermut peqataasinnaaneranut atatillugu killiliisartut angalanermut ineqarnermullu aningaasartuutit peerniarneqartut. Inuit ilinniagartuut suliffimmut allamut nuunissamut kissaateqartut tamanna ajornartorsiutigisaraat assersuutigineqarsimavoq. Maannakkut inatsisit tunngavigalugit taamatut iliniagallit ilinniarsimasatik pissutigalugit pikkorissarnermut tapiiffigineqarnissamut periarfissaqanngillat. Naatsorsuutigineqassaaq oqilisaassineq tamanna aningaasartuutinik kinguneqartussaammat. Aningaasartuutissalli taakku ataatsimiititaliamit eqqortumik naatsorsorneqarsinnaanngillat. Siunnersuut oqilisaassinermut tamatumunnga atatillugu naatsorsuutigineqanngitsumik aningaasartuutaassagaluarpat, immikkoortumi pineqartumi aningaasaliissutaareersunik aningaasartuutaasussaavoq, tamatumalu kingunerisaanik suliniutit allat pingaarnersiuinermi kingulliunneqartussanngussallutik. Siunnersuutip aappassaanneerneqarnissaanut Naalakkersuisunit tamatuma equmaffigineqarnissaa ataatsimiititaliamit kaammattuutigineqarpoq.

Oqaatsinik Pikkorissarfimmut tunngatillugu ataatsimiititaliamit maluginiarneqarpoq siulersuisunik aammalu taassuma allattoqarfianik atorunnaarsitsinerup aningaasaqarnikkut kingunerisassai aammalu Oqaatsinik Pikkorissarfik pillugu Inatsisartut inatsisaata atorunnaarsinneqarnerata allaffissornikkut aningaasaqarnikkullu kingunerisinnaasai allat Naalakkersuisunit isumaliutigineqarsimmasorinanngitsut. 2016-imi aningaasanut inatsimmi konto pingaernerme 40.92.18-imi Oqaatsinik Pikkorissarfiup ukiumut 7.188.000-inik ingerlatsinermut tapiissuteqarfigineqartarneranik allassimasoqarnera eqqarsaatigalugu aningaasaqarnikkut kingunerisassat siunnersuutip matuma aappassaanneerneqarnissaanut, oqaaseqarfigeqqullugit Naalakkersuisut ataatsimiititaliamit qinnuigineqarput.

7. Ataatsimiititaliamit inassutigineqarpoq

Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititalia **isumaqatigiittup** tamanna tunngavigalugu siunnersuut akuerineqartussanngorlugu inassuteqaatigaa.

Taamatut oqaaseqarluni isumaliutissiisummilu allanneqarsimasutut paasinnilluni ataatsimiititaliap siunnersuut appassaanniigassanngortippaa.



Vivian Motzfeldt


Vivian Motzfeldt,
Siulittaasoq



Peter Olsen,
Siulittaasup tullia



Suka K. Frederiksen



Poul Hansen



Mimi Karlsen